

25 AUG 1996
Mahathir-Lawat
MAHATHIR LAWAT ISTANA MUSIM PANAS

Oleh: Zainoor Sulaiman

BEIJING, 25 Ogos (Bernama) -- Datuk Seri Dr Mahathir Mohamad yang dalam rangka lawatan kerja empat hari ke China hari ini mengunjungi Yi He Yuan atau Istana Musim Panas di utara pinggir ibu negara China yang mempunyai tujuh juta penduduk.

Perdana Menteri, yang diiringi Naib Menteri, Suruhanjaya Perancangan Negara Zeng Peiyan, menghabiskan masa hampir setengah hari melawat istana itu yang pernah digunakan sebagai tempat perentian bagi keluarga diraja Dinasti Qing.

Taman seluas 290 hektar itu dibina oleh Maharani Ci Xi (Maharani Dowager) dan mengandungi Tasik Kunming dan Longevity Hill.

Dr Mahathir, yang diiringi Ketua Menteri Pulau Pinang Tan Sri Dr Koh Tsu Koon, Timbalan Menteri Pendidikan Datuk Dr Fong Chan Onn dan duta Malaysia ke China Mohamad Amir Jaafar, kemudian diraikan pada jamuan tengah hari oleh Zeng Peiyan, yang juga pengerusi Jawatankuasa Sambutan.

Jamuan itu diadakan di Rumah Tetamu Negara Diaoyutai.

Perdana Menteri kemudian melawat satu pameran dan demonstrasi lukisan oleh pelukis-pelukis China di Villa 14, Rumah Tetamu Negara.

Malam ini Dr Mahathir dan rombongan Malaysia akan diraikan oleh Institut Strategi dan Kepimpinan Asia (ASLI), penganjur Dialog Beijing mengenai Perkongsian Malaysia-China selama dua hari yang bermula di sini esok.

Dr Mahathir akan menyampaikan ucapan dasar bertajuk: "The Dawn of the Asian Century: A Malaysian Perspective" (Permulaan Abad Asia: Satu Perspektif Malaysia) pada pembukaan dialog itu.

Kira-kira 700 peserta -- 450 usahawan dan pegawai China dan 250 anggota sektor korporat Malaysia -- telah mendaftarkan diri bagi dialog itu.

Perdana Menteri memulakan jadual yang ketat esok dengan mengunjungi rakan sejawatannya dari China Li Peng di Eastern Hall, Great Hall of the People, diikuti dengan mesyuarat formal di Fujian Hall.

Beliau juga dijadual menemui Naib Perdana Menteri Zhu Rongji di China World Hotel dan mengunjungi Presiden Jiang Zemin di Great Hall.

-- BERNAMA
ZS AKD